

Lacid dang: khyang" phoid: khyoo:

LACID DANG: KHYANG"

1. Moin boo gyid yau - Moo" boo zoo: nyid.
Dang: phoid: - Nya: myhi' shoid kyo: myhi' phoo' yi ri yug phoo' (angh) moin yi ga: tid.
Moin: ga: zigi gyid yau re" ajhung: ri tid. Moo" ga: zigi myhi' phoo' phoug" phyid" yi ri tid. Houg: bang: nyid yoomo zoo: du yi nyid re".
2. Xang: lam" join doid - Nyhoug lam" shoo" doid.
Dang: phoid: - Byu xangsus: ce: moo" azei agoin: nyid lam" yen" mo, gi sube" join khyo" sube" moo" ze: ca" ziri tid. Nyhoug ga: zigi gougnyhoug joem ri tid. Gougnyhoug phung: mo soung lam" du: gi byug loo" ziri tid.
3. Labam nu: ri: ko lam - Xang: su: nu: ri: byu ze.
Dang: phoid: - Labam gam gi gye nu: nghoid loug we' seigmoo" gam yoo" bue" lho: seigko' joem daveung" veung" axeig xeig dab seiggam nghoid. Xangsus: byu yi we' nheigloem: nu" nham' tung" hang" yo" we' se' zoem" khoug: su: byu nyid je: lho: su: tho' mo yo" ze nyid ziri tid.
4. Myang: lain: ri: tei" byed: - Zoug: lain: ri: voo bei.
Dang: phoid: - Myang: age ri byu vho: khyo" ayo" ci:. Voo moo vhoeb khang" mo, lain: ziyo' nheigloem: nu" nham' ziyo' ashu" uri voo byu byo sain" lo" ziri tid
5. Voo moo: zoug: nyid - Boem moo: gyu: jo.
Dang: phoid: - Voogung khang" moo" moo we' voo zoug: thoem" zoug: nyid ziri si' ca". Je myhang: da" boem jham" moug: - lid jham" je zang" joyoo cang" gyu: khyo, ziri tid.
6. Zoo: gi: phoug" cang" phoug" - Lami: nyang: cang" nyang:
Dang: phoid: - Nheigboo suyen" yi we' nyang: cang" nyang: phoug" myang: go" pang" thug goo" lho: nyid yab ziri tid. Laboug lami: yi we' nyang: cang" nyang: se' phoug" se' myang: nyid yab khyoo: ri tid.
7. Xang: moo" myeing" ngeig atho' - Cid loo: youg: khi" atho'.
Dang: phoid: - Zookho' zoo: mang: yi da" jhoug" myeing" age ngeig khyoo: ri tid. Shoo" cid: mang: youg: gi atho' khi" thain: khyoo: ri tid.
8. Zoo: myi: meing: tei" khyeig: - Voo: lug khyam: phei ni:
Dang: phoid: - Zoo: myi: yi gang mo davoo yo' davoo- dameing: yo' dameing: xo' tei" lho: nyid yab khyoo: ri tid. Voolug gam gi je dain:- voobeing: je sheing:- je yung" yoomo ni: phyo: ri we' nham' je ge da" voo: nghoid.

9. Khoug: moo: gyid shau - Tho' moo: pheï" myhu".
 Dang: phoid: - Nheigloem: ayung" – nheigguid" – tid zi daja: koid zi daja: koid su: ri tid. Dang: tu' gyid zoo: lang moo nghoid ri we' atho' moo pheï" gyau" too" lang" akhoug: moo: gyid yau nyid ziri amyang.
10. Soung' yung" pyang: lei - soung boo" shoem: lei.
 Dang: phoid: - Yung" zoomyi: nu" yi ri lhu: phyo' bang: gye myo: khyoo: ri tid. Soung boo" lei da" bain: we' shoem: lei khyoo: ri tid.
11. Su: gei sang: ri nyang: shang pyang: ga:.
 Dang: phoid: - Sube" da" gei sang: su: gi nyang: ri sube" gye nyheing" khyoo: ri tid.
12. Moo" thid zoo: - Voo: thid myeig.
 Dang: phoid: - Myhi' phoo' koo" tho' thid moo" zoo" voin vu, yhi: wa zigi zoo: yi – Voo: bang yug, je: yhi: wa zigi voo: myeig nghoid ziri tid.
13. Bid noem gyi doïd - Nghang" no, myo, doïd.
 Dang: phoid: - Bid noem nyang: cang" nghoid loug we' atid asang: loo: zi yoo joem ri age yu. Dangtu' yhoem: seing: bid noem ga: wigi ngei jhid" ri dang: theing age ze" shoid. Gug, yoo koid ri nghang" soung gi lang" gug, ri foeb.
14. Soem" yu nyid soo: moo" - soem" bang kyoo soo: moo".
 Dang: phoid: -Nya: phoo' – nya: zoo: - gyeing" shang: venyi: soem" yug, dagung khyoo: ri tid. Shi" voo: Kyoo khyo, ri soem" bang soem" bang sho" ziri tid.
15. Moo" tho' zoo: age zi - gyid tho' ngoo: age zi.
 Dang: phoid: - Myhi' phoo' tho' mo zoo: yi gi amyid asoin: yu" loo: moo" zoo" a ge zeï: Myhi' phoo' ri myid: gyo: yu lho: moo" dage zeï: Wimdo, we' gyid tho' moo age nyid ziri tid.
16. Xangsu: alhid - Xam: bam abeig.
 Dang: phoid: - Byu xangsu: yi gi alhid azid" loo: nyid yab lang" vhuloem moo xam: aphyu: - kang: asheing: khyoo: ri tid.
17. Moo" ge yang: moo: zoo: zeung: - kab, gi yang: moo: joo zeung:.
 Dang: phoo: - Yoo" zoo: yoo" shug' da" myhi' phoo' yi yhoem: moo: bid noem yi zeung khyoo: ri tid. Kab, thui: je myeing da" yoo moo joo je zeung: ziri tid.
18. Moo" thui: a gyo: zoo: seing" yang" - kab thui: ano: joo seing" yang".
 Dang: phoid: -Myhi' phoo' yi jhau" dang: anau tam" gyoo: nyang: vho: khyo" nyid bang: ri tid. Gug, soung zo: main: bye: da" joo gi kab, baid loug we' agyug ziri tid.
19. Moo" myeing" ung: voin sei" sham: byang vang.
 Dang: phoid: - Myhi' phoo' nheigloem: oung: khoug: mo myid thu re" dang: ri tam" gyo: zeï: xo' zoo: yi ri tid. Sham: ri we' sei" lho: sham: pyab sham: byang moo kaid too" ca".

20. Zoo: gi nyang: boug" nyang: a sham: -Vu, zei nyang: thu' nyang: aguang".
Dang: phoid: - Zoo: yi gi nyang: tu: nyang: vho" khyo" age nyid. Myhi' phoo' vho: khyo" nyid ca". Vu, zei we' dashoid khyoo: kyeing" dathu khyoo: ri tid.
21. Moo" ug vang ri: zoo: - Byab ug vang ri: phyoug:.
Dang: phoid: - Myhi' phoo' yi da" dang: tam" gyo: zoo: yi ri tid. Phyoug: ngho' joem we' phang: lang" mhain" byab moo vang: khyoo: ri tid.
22. Zooshang: bu: ri shid: - Sham: thang" yang: nghanh ri gyau:.
Dang: phoid: - Zooshang: yi jhoug" dang: agyo: bu: yab yin" bang: ri youg: shau" khyoo: ri tid. Sham: thang" gam da" akung: ako' gyoug: lei khyoo: ri tid.
23. Myhi' phoo' khu: thung" shang" ca" - Voin yu nyoem" gab xab ca".
Dang: phoid: - Myhi' phoo' khu: da: thung" ri doem tau" xab ca". Voin yu ngho' gi soem" du: daphug da:. Hau: soem" du: mo je gyi: yung" du: ri khu: phoug" shang" khyo" nya: eig tang: zoo: da:.
24. Zoo: gi dang: sang: dakhoin" kyeung" - Xaid beig myoo: dakhaid kyeung".
Dang: phoid: - Nheigbo zooshang: yi ri dakhoin" kyeing" tid lang" se' gyoo: bye: ziri tid. Xaid gi: gye" yeig yoomo myoo: sho' lheung: ayo" nyheing beig dalheing: za: dayo" beig.
25. Xang: phang: ri voo moo: vang - Ngho' phang: ri: byab moo: vang.
Dang: phoid: - Byu xangsu: gi: pang" thug goo" wa ca" lang" voo khoug: khyoo: vang lho: yoem: yu ziri tid. Ngho' joem we' phang" lang" seig byab khoug: khyoo: phang: gau".
26. Xangyung" Labyu - Ngho' yung" jhung" sham:.
Dang: phoid: - Byu xangsu: nyang: cang" coung" coung" goo" dang: Ngho' we' jeyung" ja: ngho' gi: jhung" sham: ngho' nghoid.
27. Dei lei zoo: shang: - Dab lei jhen" thang".
Dang: phoid: - Zooshang: yi ri lolei loxei' yo" dei nhang: ziri tid. Jhen" ga" zigi myi: gye dab lei thang" nghoid.
28. Zoo: age moo" myeing yu - Gug, a ge myid myeing yu.
Dang: phoid: - Zooshang: yi loem: alug, lang" hang" nyazoo: nghoid ga: myhi' phoo' myeing yu. Gug, a gi lang" we' hau yoo khyang" myid jang: gug, agi ga: myid jang myeing yu.

29. Byu nyid nyang: gyam" nyang: - Voo yug nyang: being: nyang:
 Dang: phoid: - Byu nyid byu yab we' dagyam" tho' mo dagyam" nyid yab ziri tid.
 Voogam we' nyang: being: nyang: danghoid ziri tid.
30. Zoo: gi sham: shoin" - Loono, dain" shoin".
 Dang: phoid: - Myid sham: shoin" nyid yab boem ziri tid. Yoo phoug nuloo: joem
 we' dain" - gyeing: cang dage" mhain" lham" zoo: ziri tid.
31. Byi: yo' lhoo" - Mung yo' nham:.
 Dang: phoid: - Byi: yo' lhoo" we' dage" void ca" khyoo: ri mung yo' nham: we'
 dage" pang" goo" - thoug go" lho: nyid yab ca" khyoo: ri tid.
32. Myi: yo' lang - Kyoo: yo' oug".
 Dang: phoid: - Yhoem: seing: myhi' yhoem: seing: phoo' ga: zi we' dayug, yo'
 dayug, ajang" yoem: yu so' yu go" nyid yab ca" khyoo:. Kyoo: yo' oug" we' ajang"
 dage" jo, ca" khyoo: ri tid.
33. Xang: sho' myo, ri: bo - Nu: sho' khyoug: ri: bo.
 Dang: phoid: - Xangsu: byu yi gi se' sho' ja: nghoid yoomo nyang: nya: da"
 azhang" gi: su: yo' adu lang" gi myid sho' khyoo: ri tid. Nu: we' khyoug: agi lang"
 gi khyoug: gi bang: ri avoem" thung" nya: khyoug: ri nyhoem" pyam' ziri tid.
34. Xangshoem: damyen myen - Gyid shoem: myen lang youg.
 Dang: phoid: - Xangsu: byu yi gi daleing: lheing: za: date: shoug" go" ziri tid.
 Nghoid loug we' gyid lang gi ajang" yau shoug" go" nyid khyoo: ri tid.
35. Dapho' lam mo voem: zo: - Dagoem thung" mo gyid shoug.
 Dang: phoid: - Voem: ri dapho' moza: zoo: gyi: nyid gyoo" re". Gyid we' dagoem
 za: mo shoin" shug nyid gyoo" re" khyoo: ri tid.
- 36 .Cang" yam" gang: ri: tung: boug - Zhab yoo boin: ri: si: gung:.
 Dang: phoid: - Myiyi: yo' yuggi dayug, yo' dayug, gye jheddab goo" loug we' gang:
 go" lang" gi gye sho' lho: adoem voem" xo' tei" khyoo: ri tid. Zhab yoo we' bain
 phyed lang" yoo phoin" khoo bue" loo" bye:.
37. Cang" phung: avang ri cang" leig asi - su: phung: a vang ri: su: leig asi.
 Dang: phoid: - Byencang" yi da" phung: moo abo nyid yab - abo jhau" yu yen"
 yug, gi subi" ci: zei: nyid ziri asi.
38. Byu gyi: gi: byu moo: tei" - Voo: gyi: gi: myid moo: tei".
 Dang: phoid: - Byu gi nyang: cang" nyang: xo' tei" nyid yab ca" khyoo: ri voo:
 gyi: we' myid moo atei" lang" ayo" yug, khyoo: ri tid.

39. Voem: myhid su: tu" - Moo" myhid nyang: tu".

Dang: phoid: - Nheig yoo: lho: voem: azoo: nyid su: ri voem: ateung to"
khyoo: ri tid. Moo" zoo" gi: nyang: azei: loo: to" ri nyang: nyang: dadoem
shoug" zei:.

40. Bug thu' sheing" jhu" - Myeing yung" khyang" voin.

Dang: phoid: - Dangain" tho' mo je se' - je be su: ri tid. Byu myoo: sho' shidre"
gi koid su: ri dangain" bang: coem' coung" ziri tid.

41. Xangsu: nyang: koid nyang: ge - Khoo" pang' nyang: lhid" nyang: young".

Dang: phoid: - Nyang: ze: lang" nyang: nyid ge khyoo: ri tid. Khoo" pang'
ngho' we' nyang: shoung: yoomo nyang: yung" ga:.

42. Wimkhyang nyang: nyid thoem" nyang: teung: -Gyulung: nyang: lung" khyung:
nyang: du: bye:.

Dang: phoid: - wimkhyang wimdo, we nyang: nyid we thoem" nyang: sho: lho: nyid.

Gyulung: ga: gyuno, yi we' nyang: du: da" khyung: moo: nyang: lung" ziri tid.